



08-06-2015

Inatsisartut suleriaasianni § 37 Naalakkersuisunut apeqquteqaat aallaavigalugu maanna apeqquteqaat nassiuppara:

1.

Naalakkersuisut uppersarsinnaanerlugu tusagassiutinut tapit pillugit naalakkersuisunikkut ingerlatseriaaseq siunissami ima kinguneqassasoq suliniutinut ataasiakkaanik naammassinnineq najoqqutaralugu, inerisaanerit aammalu aalajangersimasunik tusagassiutitigut suliniutit pilersinneqarneri aallaavigalugit tapit ingerlanneqalissasut, maannamut nalinginnaanerusumik taperneqarnissamik periarfissat atorunnaarlugit?

2.

Tusagassiutinut tapit pillugit nalunaarut aaqqissuussaq nutaaq qaqugu Naalakkersuisunit suliaralugu naammassineqarnissaa naatsorsuutigineqarpa?

3.

Tusagassiutinut tapit pillugit oqallinnermut atatillugu Aningaasaqarnermut ataatsimiititaliap aalajangersimasumik innersuussisimanagera, tamatumani suliniutit aallaavigalugit tapeqalersitsinissat tikkuunneqarsimasut Naalakkersuisunit isigineqarpata? Taamaattoqarsimappat, Naalakkersuisut tikkuussinerit tunngavilersuutit takussutississinnaavaat?

(Inatsisartunut ilaasortaq Inatsisartut, Naaja H. Nathanielsen)

Tunngavilersuut

Aningaasaqarnermut inatsisip 2015imoortoq Inatsisartunit amerlanerussuseqartunit akuersissutigineqarluni atuutsinneqarlersumut atatillugu tusagassiutinut tapit atorunnaarsinneqarput. Taarsiullugu taperneqarnissamik periarfissaq nutaaq pilersinneqarpoq, suli aalajangersimasumik ilusilersorneqanngitsoq. Amerlanerussuteqartut tamatumani siumoortumik tapeeriaaseq akuersissutigaat, naak ilisimannikkaluarlugu taperneqarnissamut piumasaqaatit qanoq ilusilersorneqassanersut.

Pisup kingorna Kultureqarnermut, Ilinniartitaanermut Oqaluffeqarnermullu Naalakkersuisup akisussaasup nalunaarusiassamut missingiut suliarivaa maannamut tusagassiornikkut tapiutaasartunik taarsiutissatut suliassaq. Nalunaarusiaq suli

suliarineqarpoq, ersarissereerporli imarisamigut malunniuteqaqisumik siunissami allannguinernek kinguneqassasoq.

Takusinnaavara tusagassiutinut tapit nutaarsiassani suli annertuumik sammineqartut, Inatsisartunilu partiinit arlariinnit soqutigineqarlutik malinnaavigineqartut. Taamaammatt isumaqarpunga oqallinnermut iluaqutaassasoq naalakkersuisoqatigiinnit iliuusissatut pilersaarutigineqartut maannarpiaq suliarineqartut tusagassiutinut tapinut tunngasut aalajangersimasumik nassuiarneqarpata.

Ullut suliffiusut qulit ingerlanerini akissuteqaateqarfigineqarnissara qinnutigissavara.